

Inatsisartut suleriaasianni § 33 naapertorlugu aalajangiiffigisassatut siunnersuut manna matumuuna Naalakkersuisunit saqqummiunneqarpoq:

Politiit atuuffiat pillugu inatsisip Kalaallit Nunaannut atuutilernissaanut peqqussutissatut missingiummut Namminersorlutik Oqartussat akuersinissat pillugu Inatsisartut aalajangiiffigisassaattut siunnersuut.

(Isumaginninnermut, Ilaqtariinnut Inatsisinillu Atuutsitsinnermut Naalakkersuisoq)

Tungavilersuineq

Politiit sulinerat pillugu inatsisip Kalaallit Nunaanni atuutilersinneqarnera pillugu peqqussutissamut missingiut Naalakkersuisut tigusiavaat (Politiit pillugit inatsit).

Politiit atuuffiat pillugu ullumikkumut naleqquttumik inatsisitigut tungaveqarnissap pilersinneqarnissaa peqqussutip siunertaraa, matumani nalinginnaasumik inatsisinik aalajangersakkanillu malititsiniaanermut atatillugu politiit pissaanermik atuisarnerannut pingaaruteqartumik tungavissat aalajangersarneqarneri ilanngullugit. Suliassaqarfimmi inatsisitigut maleruagassat ersarissut peqqussutikkut pilersinneqassapput, tassuunakkullu innuttaasut inatsisitigut isumannaatsuunissaat patajaallisaavigineqassaaq taassumalu peqatigisaanik pisuni politiit suliassaminnik suliarinninnerminnut atatillugu pisariaqartumik innuttaasunut akuliuttussaattillugit, pissaanermik atuisoqassappat pissaanermik atuinissamut politiit ersarissunik inatsisitigut malitassaannik tungavilissallugit.

Innuttaasut akuleruffigineqartarnerat pillugu malittarisassat ullumikkut Kalaallit Nunaanni Eqqartuussisarnermik inatsimmi atuuttut pingaarnertut ingerlateqqinneqarnissaat erseqqissaavigineqarnissaallu peqqussutip anguniarppaa. Akuliussinnaanermut periarfissat atuuttut killilernissai imaluunniit annertusineqarnissai siunertarineqanngilaq.

Peqqussummi immikkoortut pingaarnertit tassaapput:

Politiit suliassat:

Politiit suut suliarisassaneraat pillugit malittarisassat aallaqqaasiutigalugit missingiummi imaritinneqarput.

Pinerluuteqarnermut tungasut pitsaaliorneqarnissaat, pinerluttuliornerillu unitsinneqarnissaat, inunntu ataasiakkaanut navianartorsiorfitsinerit pitsaaliornissaat aamma inuiaqatigiit isumannaatsuunissaat kiisalu navianartorsiortoqartillugu innuttaasunik ikiuinissaq politiit ilaatigut suliassarigaat tassani takuneqarsinnaavoq.

Tamatuma saniatigut nakkutiginninnerit nakkutilliinerillu kisaalu oqartussaasunik allanik ikiuineq politiit suliarissavaat.

Politiit akuliuttarnerat:

Navianartorsiorsinnaanerup pitsaaliorneqarnissaa siunertaralugu politiit inunntu qanoq akuleruttassanersut pillugit malittarisassanik sukumiisunik missingiut imaqarpoq.

Politiit ilaatigut peqqussummik naalakkiisinnaatitaapput, inuup timaanik pineqartullu pisattanillu allanik tigummiaanik misissuisinnaatitaapput, kiisalu inuup pineqartup pisataanik arsaarinnissinnaallutik. Iliuserisinnaasaat taaneqartut naammangippata, inuk inunntu allanut imaluunniit imminut navianartorsiorfitsisut kiffaanngissusiarnissaannut politiit

periarfissaqarput. Innuttaasunut akulerunneq annikinnerpaaq politiit atussagaat piumasaqaatigineqarportaaq.

Naggataatigut inuiaqatigiinni toqqissisimaneq isumannaassuserlu pillugit akornusiisinnaanerup, inuinnaat isumannaatsuunissaannut imaluunniit inuit ataasiakkaat isumannaatsuunissaasa ingalassimatinneqarnissaat pisariaqartinneqartillugu, politiit eqqartuussiviup aalajangiinera peqqaarnagu sumiiffinnut tamanut iserfigineqarsinnaanngitsunut isersinnaatitaanermik pissarsisinnaapput.

Politiit pissaanermik atuinerat:

Qaqugukkut politiit pissaanermik atuisinnaanerat aamma missingiummi aalajangersarneqarpoq.

Ilaatigut navianartorsiorneq pitsaaliorniarlugu, inuk sakkumik tigummiaqarnersoq misissorniarlugu, pinerlunnerit unitsinniarlugit kiisalu meeraq aalakoornersoq napparsimanersorluunniit imaluunniit inuk nammineq ikiorsinnaanngitsoq navianartorsiornersoq nalilersussallugu, missingiut malillugu politiit pissaanermik atuisinnaatitaapput.

Pissaanermik atuneq pissutsit tassunga tunngasut najoqqutaralugit sapinngisamik qajassuartumik pissasoq, taamaaliortoqarnikkullu ajoqusertoqassagalarpat ajoqusernerit minnerpaaffissamiitinneqassasut missingiummi erseqqissumik allaqqavoq. Taamaattumik politiit pissaanermik atuinerat pisariaqartuussaaq illersorneqarsinnaassallunilu, taamaallaallu illersorniakkanut naapertuuttunik atortoqarluni naapertuuttumillu annertussuseqarluni pissalluni.

Kiisalu qaqugukkut qanoq ilisukkullu politiit aallaasinik, anaatinik, qimminik, gassinik peberspray-inillu atuisinnaaneri pillugit malittarisassat sukumiisut missingiummi allaqqapput.

Piginnaatinneqarnerit pillugit malittarisassat:

Piginnaatitsinernik pillugit malittarisassanik arlalinnik missingiut imaqarpoq.

Tamatuma kingorna kommuninut tamanut aamma Kalaallit Nunaata Avannaata kangiani Nunami Allanngutsaaliukkami politiit ileqqoreqqusaannik Justitsministeeriaqarfik suliaqarsinnaavoq.

Kommunini politiit ileqqoreqqusaat politidirektørip kommunimik eqqartueqatigereernerata kingorna taassuma suliarissagaa missingiunni takuneqarsinnaavoq, Kalaallit Nunaata Avannaata Kangianili Nunamut Allanngutsaaliukkamulli politiit ileqqoreqqusaat Naalakkersuinik eqqartueqatigeereernikkut suliarineqassalluni.

Politiit ileqqoreqqusaanni ilaatigut aalajangersarneqarsinnaasut tassaapput inuit torersumik eqqissisimasumillu inuunissaasa qulakkeerneqarnissaannut, inuit ataasiakkaat illersorneqarnissaannut, inuinnaat isumannaatsuunissaannut, utaqqiisaagallartumik inerteqquteqarsinnaanermut imaluunniit peqqussuteqarnissamut kiisalu maleruagassanik malinninnginnermi kinguneqartitsinernut aalajangersakkat.

Nakorsat misissuineri:

Kalaallit Nunaata isorartunerujussua tunngavigalugu, aamma nunap ilaani inoqarfiusuni tamani nakorsaqqannginnera pissutigalugu, qallunaat politiit pillugit inatsisaanni aalajangersakkat inuup erngerluni nakorsamit misissorneqarnissaanik imallit, misissuineq piaarnerpaamik pisussanngorlugu allanngortinneqarput. Piffimmi pineqartumi nakorsaqqanngippat peqqinnissaqarfimmi sulisut allat misissuinerimik ingerlatsisinnaanerat

pillugu, peqqinnissaqarfiup aalajangiisinnaanera aammattaaq erseqqissaatigineqarpoq. Ullumikkut sulisaatsini pisut suliarineqartarnerannut tamanna naapertuuppoq. Misissuinerup peqqinnissaqarfimmi sulisumit allamit suliarineqarnissaa (nakorsaangitsumit) pillugu naliliisoqarneqarnerani, manna tikillugu pisarnertut aappatigut nakorsamik pisariaqartitsineq (inuup pineqartup peqqinnikkut qanoq issusia) aappatigullu inuup pineqartup nakorsamit takuneqarnissaanut ajoqutit (assersuutigalugu nunap isorartunera pissutigalugu assartuineranut aningaasartuutit) nalilersuiffigineqassapput.

Illersornissaqarfiup politiinut ikiorsiissutaat:

Politiit nammineq isumalluutaat naammanngippata imaluunniit suliamut pineqartumut Illersornissaqarfiup isumalluutaasulli naleqqutiginnippata, suliat suut pineqartillugit politiit Illersornissaqarfimmit ikiorneqarnissamik qinnuteqarsinnaanersut pillugit naggataagut missingiut aalajangersakkanik imaqarpoq.

Naalackersuisut missingiummut oqaaseqaataat

Politiit atuuffiat pillugu inatsisip Kalaallit Nunaannut atuutilersinneqarnissaa pillugu peqqussut Kalaallit Nunaanni inatsisip atuutsitsinermut suliaqarfimmi inatsisip nutarterineq Justitsministeriaqarfiup Isumaginninnermut, Ilaqutariinnut Inatsisillu Atuutsitsinermut Naalackersuisoqarfiullu suleqatigiinneranut ilaavoq, taamaalilluni tamanna qallunaat pitsaassuseqartitsineranut naapertuutilissalluni.

Peqqussutikkut politiit atuuffii pillugit ersarissunik ullumikkumullu naapertuuttunik inatsisipigut maleruagassanik aalajangersaasoqarpoq, taamaaliortoqarneratalu innuttaasut inatsisipigut isumannaatsuunissaat patajaallisassavaa, politiillu sulinerminni inatsisipigut ersarissunik tunngaveqalissapput, matumani ingammik akulerussinnaaneq aamma pissaanermik atuisinnaaneq ilanngullugit.

Peqqussummi innuttaasut akuleruffigisinnaanissaanut politiit periarfissaat pillugit maannakkut malittarisassat atuuttut ingerlatiinnarnissaat erseqqissaavigineqarnissaalu pingaartinneqarmata erseqqissaatigineqassaaq. Taamaammat akuliussinnaanermut periarfissat atuuttut killilernissai imaluunniit annertusineqarnissai siunertarineqanngilaq.

Peqqussutip aalajangersimasumik atuutilerfissaa inaarutaasumik aalajangerneqanngilaq. Peqqussummi taaguutip "politidirektør"-ip atornerqarnera tassunga pissutaavoq. Politiit pillugit aaqquissuseqqinneq pillugu eqqartuussisarnermik inatsisip allanngortinneqarnissaa akuersissutigineqarpat, massakkut "politimester"-imik taaguuteqartitsineq taaguutip taassuma taarsissavaa. Kisianni immikkoortut sorliit oqaluuserineqaaqaassanersut akuersissutigineqaaqaassanersullu siumut oqaatigineqareersinnaanngimmat, eqqartuussisarnermik inatsisip allannguutaa Inatsisartuni Folketing-imilu akuersissutigineqartinnagu peqqussut atuutilersinneqarsinnaanngilaq.

Pisortani aningaasarsiornikkut allaffissornikkullu kingunerisassat

Soqanngilaq

Aningaasaqarnikkut allaffissornikkullu namminersorlutik inuussutissarsiutilinnut kingunerisassat

Soqanngilaq.

Innuttaasunut aningaasaqarnikkut allaffissornikkullu kingunerisassat

Soqanngilaq.

Tusarniaaneq

Justitsministeeriaqarfiup tusarniaaneq isumagaa, tusarniaanermilu kalaallit oqartussaasui attuumassuteqartut peqataatinneqarsimapput.